

四庫全書

史部

欽定四庫全書

史部

南齊書卷

二至六

詳校官編修

臣

李潢

沈馬

臣

王坦修覆勘

覆校官編修

臣

汪鏞

校對官主事

臣

張培

謄錄舉人

臣

吳壽朋

謄錄監生

臣

莊瑩

欽定四庫全書

南齊書卷二

梁 蕭 子

顯 撰

本紀第二

高帝下

建元元年夏四月甲午上即皇帝位於南郊設壇紫燎告天曰皇帝臣道成敢用玄牡昭告皇皇后帝宋帝陟鑒乾序欽若明命以命于道成夫肇自生民樹以司牧

所以闡極則天開元創物肆茲大道天下惟公命不於
常昔在虞夏受終上代粵自漢魏揖讓中葉咸炳諸典
謨載在方冊水德既微仍世多故寔賴道成匡拯之功
以弘濟於厥艱大造顛墜再構區宇宣禮明刑締仁緝
義晷緯凝象川岳表靈誕惟天人罔弗和會乃仰協歸
運景屬與能用集大命於茲辭德匪嗣至於累仍而羣
公卿士庶尹御事爰及黎獻至於百戎僉曰皇天眷命
不可以固違人神無託不可以曠主畏天之威敢不祇

從鴻厯敬簡元辰虔奉皇符升壇受禪告類上帝以永
答民衷式敷萬國惟明靈是饗禮畢大駕還宮臨太極
前殿詔曰五德更紹帝跡所以代昌三正迭隆王度所
以改耀世有質文時或因革其資元膺厯經道振民固
以異術同揆殊流共貫者矣朕以寡昧屬值艱季推肆
勤之誠藉樂治之數賢能悉心士民致力用獲拯溺龕
暴一匡天下業未叅古功殆侔昔宋氏以凌夷有徵厯
數攸及思弘樂推永鑒崇替爰集天祿於朕躬惟志菲

薄辭弗獲昭遂欽從天人式繇景命祇月正於文祖升
禋於上帝猥以寡德光宅四海纂草代之蹤託王公
之上若涉淵水罔知所濟寶祚初啓洪慶惟新思俾利
澤宣被億兆可大赦天下改昇明三年為建元元年賜
人爵二級文武進位二等鰥寡孤獨不能自存者穀人
五斛逋租宿債勿復收有犯鄉論清議贓汙淫盜一皆
蕩滌洗除先注與之更始長徒救繫之囚特皆原遣亡
官失爵禁錮奪勞一依舊典封宋帝為汝陰王築宮丹

陽縣故治行宋正朔車旗服色一如故事上書不為表
荅表不稱詔降宋晉熙王燮為陰安公江夏王躋為沙
陽公隨王翽為舞陰公新興王嵩為定襄公建安王禧
為荔浦公郡公主為縣君縣公主為鄉君詔曰繼世象
賢列代盛典疇庸嗣美前載令圖宗氏通侯乃宜隨運
省替但欽德懷義尚表墳閭况功濟區夏道光民俗者
哉降差之典宜遵往制南康縣公華容縣公可為侯萍
鄉縣侯可為伯減戶有差以繼劉穆之王弘何無忌後

以司空褚淵為司徒吳郡太守柳世隆為南豫州刺史
詔曰宸運肇創寶命維新宜弘慶宥廣敷蠲汰刼賊餘
口沒在臺府者悉原赦諸負豐流徙普聽還本土以齊
國左衛將軍陳顯達為中護軍中領軍王敬則為南充
州刺史左衛將軍李安民為中領軍戊戌以荊州刺史
寢為尚書令驃騎大將軍開府儀同三司揚州刺史冠
軍將軍映為荊州刺史西中郎將晃為南徐州刺史冠
軍將軍垣崇祖為豫州刺史驃騎司馬崔文仲為徐州

刺史斷四方上慶禮巳亥詔曰自廬井毀制農桑易業
鹽鐵妨民貨鬻傷治歷代成俗流蠹歲滋援拯遺弊草
未反本使公不專利氓無失業二宮諸王悉不得營立
屯邸封略山湖太官池籞宮停稅入優量省置庚子詔
宋帝后藩王諸陵宜有守衛有司奏帝陵各置長一人
兵有差王陵五人妃嬪三人五月丙午進河南王吐谷
渾拾寅號驃騎大將軍詔曰宸運革命引爵改封宋氏
第秩雖宜省替其有預効屯夷宣力齊業者一仍本封

無所減降有司奏留襄陽郡公張敬兒等六十二人除
廣興郡公沈曇亮等百二十二人改元嘉歷為建元歷
木德盛卯終未以正月卯祖十二月未臘丁未詔曰設
募取將懸賞購士蓋出權宜非曰恒制頃世艱險浸以
成俗且長逋逸開罪山湖是為黥刑不辱亡竄無咎自
今以後可斷衆募壬子詔封佐命文武功臣新除司徒
褚淵等三十一人進爵增戶各有差乙卯河南王吐谷
渾拾寅奉表貢獻丙辰詔遣大使分行四方遣兼散騎

常侍十二人巡行以交寧道遠不遣使己未汝陰王薨
追諡為宋順帝終禮依魏元晉恭帝故事辛酉陰安公
劉燮等伏誅追封諡上兄道度為衡陽元王道生為始
安貞王丙寅追尊皇考曰宣皇帝皇妣為孝皇后妃為
昭皇后六月辛未詔相國驃騎中軍三府職可依資勞
度二官若職限已盈所餘可賜滿壬申以游擊將軍周
山圖為兖州刺史乙亥詔曰宋末頻年戎寇兼災疾凋
損或枯骸不收毀櫬莫掩宜速宣下埋藏營邱若標題

猶存姓字可識可即運載致還本鄉有司奏遣外監典
事四人周行離門外三十五里為限其餘班下州郡無
棺器標題者屬所以臺錢供市庚辰七廟主備法駕即
于太廟詔諸將及客戮力艱難盡勤直衛其從還宮者
普賜位一階辛巳罷荊州刺史甲申立皇太子疇斷諸
州郡禮慶見刑入重者降一等并申前赦恩百日立皇
子寢為豫章王映為臨川王晃為長沙王畢為武陵王
暉為安成王鏘為鄱陽王鐸為桂陽王鑑為廣陵王皇

孫長懋為南郡王乙酉葬宋順帝於遂寧陵秋七月丁未詔曰交趾比景獨隔書翔斯乃前運方季負海不朝因迷遂往歸款莫由曲赦交州部內李叔獻一人即撫南土文武詳才選用并遣大使宣揚朝恩以試守武平太守行交州府事李叔獻為交州刺史丙辰以虜偽茹盧鎮主陰平公楊廣香為沙州刺史丁巳詔南蘭陵桑梓本鄉長蠲租布武進王業所基復十年九月辛丑詔二吳義興三郡遭水減今年田租乙巳以新除尚書令

驃騎將軍豫章王嶷為荊湘二州刺史平西將軍臨川王映為揚州刺史丙午司空褚淵領尚書令戊申車駕幸宣武堂宴會詔諸王公以下賦詩冬十月丙子立彭城劉劭為汝陰王奉宋帝後已卯車駕殷祀太廟辛巳詔曰朕嬰綴世務三十餘歲險阻艱難備嘗之矣末路屯夷戎車歲駕誠藉時來之運實資士民之力宋元徽二年以來諸從軍得官者未悉蒙祿可催速下訪隨正即給才堪餘任者訪洗量序若四州士庶本鄉淪陷簿

籍不存尋校無所可聽州郡保押從實除奏荒遠關中
正者特許據軍簿奏除或戍扞邊役末由旋反聽於同
軍各立五保所隸有司時為言列汝陰太妃王氏薨追
贈為宋恭皇后十一月庚子以太子左衛率蕭景先為
司州刺史辛亥立皇太子妃裴氏甲申封功臣驃騎長
史江謐等十人爵戶各有差

二年春正月戊戌朔大赦天下以司空尚書令褚淵為
司徒中軍將軍張敬兒為車騎將軍中領軍李安民為

領軍將軍中護軍陳顯達為護軍將軍辛丑車駕親祀
南郊癸卯詔索虜寇淮泗遣衆軍北伐內外纂嚴二月
丁卯虜寇壽陽豫州刺史垣崇祖破走之置巴州壬申
以三巴校尉明慧昭為巴州刺史戊子以寧蠻校尉蕭
赤斧為雍州刺史南蠻長史崔慧景為梁南秦二州刺
史辛卯詔西境獻捷解嚴癸巳遣大使巡慰淮肥徐豫
邊民尤貧邁難者刺史二千石量加賑卹甲午詔江西
北民避難流徙者制遣還本土蠲今年租稅單貧及孤

老不能自存者即聽番籍郡縣押領三月丁酉以侍中
西昌侯鸞為郢州刺史戊戌以護軍將軍陳顯達為南
兖州刺史吳郡太守張岱為中護軍己亥車駕幸樂遊
苑宴王公以下賦詩辛丑以征虜將軍崔思祖為青冀
二州刺史夏四月丙寅進高麗王樂浪公高璉號驃騎
大將軍五月立六門都牆六月癸未詔昔歲水旱曲赦
丹陽二吳義興四郡遭水尤劇之縣元年以前三調未
充虛列已畢官長局吏應共償備外詳所除宥秋七月

甲寅以輔國將軍盧紹之為青冀二州刺史戊午皇太子妃裴氏薨閏月辛巳遣領軍將軍李安民行淮泗庚寅索虜攻朐山青冀二州刺史盧紹之等破走之冬十一月戊子以氐楊後起為秦州刺史十二月戊戌以司空褚淵為司徒乙巳車駕幸中堂聽訟壬子以驃騎大將軍豫章王嶷為司空揚州刺史前將軍臨川王映為荊州刺史

三年春正月壬戌朔詔王公卿士薦謹言丙子以平北

將軍陳顯達為益州刺史貞陽公柳世隆為南充州刺史皇子鋒為江夏王領軍將軍李安民等破虜於淮陽夏四月以寧朔將軍沈景德為廣州刺史六月壬子大赦逋租宿債除減有差秋七月以冠軍將軍垣榮祖為徐州刺史冬十月戊子以河南王世子吐谷渾易度侯為西秦河二州刺史河南王

四年春正月壬戌詔曰夫膠庠之典彝倫攸先所以招振才端啓族性緒弘字黎氓納之軌義是故五禮之跡

可傳六樂之容不泯朕自膺歷受圖志闡經訓且有司
羣僚奏議咸集蓋以戎車時警文教未宣思樂泮宮永
言多慨今關燧無虞時和歲稔遠邇同風華夷慕義便
可式遵前准修建黜學精選儒官廣延國胄以江州刺
史王延之為右光祿大夫癸亥詔曰比歲申威西北義
勇爭先殞氣寇塲命盡王事戰亡蠲復雖有恒典主者
遵用每傷簡薄建元以來戰亡賞蠲租布二十年雜役
十年其不得收屍主軍保押亦同此例以後將軍長沙

王晃為護軍將軍中軍將軍南郡王長懋為南徐州刺史冠軍將軍安成王暕為江州刺史二月乙未以冠軍將軍桓康為青冀二州刺史上不豫庚辰詔原京師囚繫有差元年以前逋責皆原除三月庚申召司徒褚淵左僕射王儉詔曰吾本布衣素族念不到此因藉時來遂隆大業風道沾被升平可期邁疾彌留至於大漸公等奉太子如事吾柔遠能邇緝和內外當令太子敦穆親戚委任賢才崇尚節儉弘宣簡惠則天下之理盡矣

死生有命夫復何言壬戌上崩於臨光殿年五十六四月庚寅上謚曰太祖高皇帝奉梓宮於東府前渚升龍舟丙午寔武進泰安陵上少沈深有大量寬嚴清儉喜怒無色博涉經史善屬文工草隸書奕棋第二品雖經綸夷險不廢素業從諫察謀以威重得衆即位後身不御精細之物敕中書舍人桓景真曰主衣中似有玉介導此制始自大明末後泰始尤增其麗留此置主衣政是興長疾源可即時打碎凡復有可異物皆宜隨例也

後宮器物欄檻以銅為飾者皆改用鐵內殿施黃紗帳
宮人著紫皮履華蓋除金花爪用鐵迴釘每曰使我治
天下十年當使黃金與土同價欲以身率天下移變風
俗上姓名骨體及期運厯數竝遠應圖讖數十百條歷
代所未有臣下撰錄上抑而不宣盛矣

史臣曰孫卿有言聖人之有天下受之也非取之也漢
高神武駿聖觀秦氏東遊蓋是雅多大言非始自知天
命光武聞少公之論讖亦特一時之笑語魏武初起義

兵所期征西之墓晉宣不內迫曹爽豈有定霸浮橋宋氏崛起匹夫兵由義立咸皆一世推雄卒開鼎祚宋氏正位八君卜年五紀四絕長嫡三稱中興內難邊虞兵革世動太祖基命之初武功潛用泰始開運大拯時艱龍德在田見猜雲雨之迹及蒼梧暴虐豐結朝野百姓懔懔命懸朝夕權道既行兼濟天下元功振主利器難以假人羣才戮力實懷尺寸之望豈其天厭水行固已人希木德歸功與能事極乎此雖至公於四海而運實

時來無心於黃屋而道隨物變應而不為此皇齊所以
集大命也

贊曰於皇太祖有命自天同度宇宙合量山淵宋德不
紹神器虛傳寧亂以武黜暴資賢庸蒞西疆功興北翰
偏師獨克孤旅霆斷援旆東夏職司靜亂拍斧徐方時
惟伐叛抗威京輦坐清江漢文藝在躬芳塵淵塞用下
以才鎮民以德端已雄睟君臨尊默苞括四海大造家

國

南齊書卷二

南齊書卷二考證

高帝本紀下建元元年夏四月丙寅追尊皇考曰宣皇

帝皇妣為孝皇后

○臣祖庚

按通鑑同南史在甲午

二年正月以司空尚書令褚淵為司徒○臣祖庚按十

二月以司空褚淵為司徒其事複見其月互異又淵

傳三年為司徒又固讓四年寢疾遜位改授司空據

此則淵以三年為司徒四年為司空而紀又云四年

八月癸卯司徒褚淵薨紀傳前後各不相顧

二月丁卯虜寇壽陽○

臣祖庚

按通鑑作己酉攷異曰

是月辛卯朔無丁卯

五月立六都門牆○

臣宗萬

按通鑑云自晉以來建康

宮之外城惟設竹籬而有六門會有彘白虎樽者命
改立都牆又白虎樽即白獸樽晉書避唐諱故曰獸
也

河南王世子吐谷渾易度侯○易度侯諸本皆作度易
侯今從氏羌傳改正

南齊書卷二考證

欽定四庫全書

南齊書卷三

梁

蕭

子

顯

撰

本紀第三

武帝

世祖武皇帝諱賁字宣遠太祖長子也小諱龍兒生於建康青溪宅其夜陳孝后劉昭后同夢龍據屋上故字上焉初為尋陽國侍郎辟州西曹書佐出為贛令江州

刺史晉安王子勛反上不從命南康相沈肅之繫上於
郡獄族人蕭欣祖門客桓康等破郡迎出上肅之率將
吏數百人追擊上與左右拒戰生獲肅之斬首百餘級
遂率部曲百餘人舉義兵始興相殷孚將萬兵赴子勛
於尋陽或勸上擊之上以衆寡不敵避屯揭陽山中聚
衆至三千人子勛遣其將戴凱之為南康相及軍主張
宗之千餘人助之上引兵向郡擊凱之別軍主程超數
百人於南康口又進擊宗之破斬之遂圍郡城凱之以

數千人固守上親率將士盡日攻之城陷凱之奔走殺
偽贛令陶冲之上即據郡城遣軍主張應期鄧惠真三
千人襲豫章子勛遣軍主談秀之等七千人與應期相
拒於西昌築營壘交戰不能決聞上將自下秀之等退
散事平徵為尚書庫部郎征北中兵叅軍西陽縣子帶
南東莞太守越騎校尉正員郎劉韞撫軍長史襄陽太
守別封贛縣子邑三百戶固辭不受轉寧朔將軍廣興
相桂陽王休範反上遣軍襲尋陽至北嶠事平除晉熙

王安西諮議不拜復還郡轉司徒右長史黃門郎沈攸之在荆楚宋朝密為之備元徽四年以上為晉熙王鎮西長史江夏內史行郢州事順帝立徵晉熙王變為撫軍揚州刺史以上為左衛將軍輔變俱下沈攸之事起未得朝廷處分上以中流可以待敵即據盆口城為戰守之備太祖聞之喜曰此真我子也上表求西討不許乃遣偏軍援郢平西將軍黃回等皆受上節度加上冠軍將軍持節昇明二年事平轉散騎常侍都督江州豫

州之新蔡晉熙二郡軍事征虜將軍江州刺史持節如
故封聞喜縣侯邑二千戶其年徵侍中領軍將軍給鼓
吹一部府置佐史領石頭戍軍事尋又加持節督京畿
諸軍事三年轉散騎常侍尚書僕射中軍大將軍開府
儀同三司進爵為公持節都督領軍如故給班劍二十
人齊國建為齊公世子改加侍中南豫州刺史給油絡
車羽葆鼓吹增班劍為四十人以石頭為世子宫官置
二率以下坊省服章一如東宮進爵王太子太祖即位

為皇太子建元四年三月壬戌太祖崩上即位大赦征
鎮州郡令長軍屯營部各行喪三日不得擅離任都邑
城守防備幢隊一不得還乙丑稱先帝遺詔以司徒褚
淵錄尚書事尚書左僕射王儉為尚書令車騎將軍張
敬兒為開府儀同三司詔曰喪禮雖有定制先旨每存
簡約內官可三日一還臨外官間一日還臨後有大喪
皆如之丁卯以右衛將軍呂安國為司州刺史庚午以
司空豫章王嶷為太尉癸酉詔曰城直之制歷代宜同

頃歲逋弛遂以萬計雖在憲宜懲而原心可亮積年逋城可恚原蕩自茲以後申明舊科有違糾裁庚辰詔曰比歲未稔貧窮不少京師二岸多離其弊遣中書舍人優量賑卹夏四月丙午以輔國將軍張倪為兗州刺史辛卯追尊穆妃為皇后五月乙丑以丹陽尹聞喜公子良為南徐州刺史甲戌以新除左衛將軍垣崇祖為豫州刺史癸未詔曰頃水雨頻降潮流荐滿二岍居民多所淹漬遣中書舍人與兩縣官長優量賑卹六月甲申

立皇太子長懋詔申壬戌赦恩百日乙酉以鄱陽王鏘
為雍州刺史臨汝公子卿為郢州刺史甲午以寧朔將
軍臧靈智為越州刺史丙申立皇太子妃王氏進封聞
喜公子良為竟陵王臨汝公子卿為廬陵王應城公子
敬為安陸王江陵公子懋為晉安王枝江公子隆為隨
郡王皇子子真為建安王皇孫昭業為南郡王戊戌詔
曰水潦為患星緯乖序京都囚繫可剋日訊決諸遠獄
委刺史以時察判建康秣陵二縣貧民加賑賜必令周

患吳興義興遭水縣蠲除租調癸卯以司徒褚淵為司
空驃騎將軍秋七月庚申以衛尉蕭順之為豫州刺史
壬戌以冠軍將軍垣榮祖為青冀二州刺史八月癸卯
司徒褚淵薨九月丁巳以國哀故罷國子學巳巳以前
軍將軍姜伯起為秦州刺史辛未以征南將軍王僧虔
為左光祿大夫開府儀同三司尚書右僕射王奐為湘
州刺史冬十二月巳丑詔曰緣淮戍將久處邊勞三元
行始宜沾恩慶可遣中書舍人宣旨臨會後每歲皆如

之庚子以太子左衛率戴僧靜為徐州刺史

永明元年春正月辛亥車駕祀南郊大赦改元壬子詔
內外羣僚各舉朕違肆心規諫又詔王公卿士各舉所
知隨方登叙詔曰經邦之寄寔資莅民守宰祿俸蓋有
恒準往以邊虞告警故公時損益今區寓寧晏庶績咸
熙念勤簡能宜加優獎郡縣丞尉可還田秩太尉豫章
王嶷領太子太傅護軍將軍長沙王晃為南徐州刺史
鎮北將軍竟陵王子良為南兖州刺史庚申以侍中蕭

景先為中領軍壬戌立皇弟銳為南平王鏗為宜都王
皇子子明為武昌王子罕為南海王甲子為築青溪舊
宮詔槩仗瞻履二月辛巳以征虜將軍楊昱為沙州刺
史辛丑以隴西公宕昌王梁彌機為河涼二州刺史東
羌王像舒彭為西涼州刺史三月癸丑詔曰宋德將季
風軌陵遲列宰庶邦彌失其序遷謝遼速公私凋弊泰
運初基草昧惟始思述先範永隆治根莅民之職一以
小滿為限其有聲績剋舉厚加甄異理務無庸隨時代

黜丙辰詔曰朕自丁荼毒奄便周忌瞻言負荷若墜淵
壑而遠圖尚蔽政刑未理星緯失序陰陽愆度思播先
澤無酬天青可申辛亥赦恩五十日以期訖為始京師
囚繫悉皆原有三署軍徒優量降遣都邑鰥寡尤貧詳
加賑卹戊寅詔四方見囚罪無輕重及劫賊餘口長徒
勅繫悉原赦逋負督贓建元四年三月以前皆特除夏
四月壬午詔曰魏矜袁紹恩洽丘墓晉亮兩王榮覃餘
裔二代弘義前載美談袁祭劉秉與先朝同獎宋室沈

攸之於景和之世特有迺心雖末節不終而始誠可錄
歲月彌往宜特優降祭秉前年改葬塋兆未修材槨可
為經理令粗足周禮攸之及其諸子喪柩在西者可符
荊州送反舊墓在所為營葬事五月丁酉車騎將軍張
敬兒伏誅六月丙寅詔凡坐事應覆治者在建元四年
三月以前皆原宥秋七月戊戌新除左光祿大夫王僧
虔加特進九月己卯以荊州刺史臨川王映為驃騎將
軍冠軍將軍廬陵王子卿為荊州刺史吳郡太守安陸

侯緬為郢州刺史

二年春正月乙亥以司州刺史呂安國為南兖州刺史
征北將軍竟陵王子良為護軍將軍兼司徒征北長史
劉悛為司州刺史丙子以右光祿大夫王延之為特進
三月乙亥以吳興太守張岱為南兖州刺史前將軍王
奐為江州刺史平北將軍呂安國為湘州刺史戊寅以
少府趙景翼為廣州刺史夏四月甲辰詔揚南徐南兖
徐兖五州統內諸獄并豫江三州府州見囚江州尋陽

新蔡兩郡繫獄竝部送還臺須候克日斷枉直緣江遠
郡及諸州委刺史詳察訊已巳以寧朔將軍程法勤為
寧州刺史六月癸卯車駕幸中堂聽訟乙巳以安陸王
子敬為南兖州刺史戊申以黃門侍郎崔平仲為青冀
二州刺史秋七月癸未詔曰夫樂所自生先哲垂誥禮
不忘本積代同風是以漢光遲回於南陽魏文殷勤於
譙國青溪宮體天含暉則地栖寶光定靈源允集符命
在昔期運初開經綸方遠繕築之勞我則未暇時流事

往永惟哽咽朕以寡薄嗣奉鴻基思存締構式表王跡
考星創制揆日興功予來告畢規摹昭備宜申豐落之
禮以暢感慰之懷可克日小會甲申立皇子子倫為巴
陵王八月丙午車駕幸舊宮小會設金石樂在位者賦
詩詔申京師獄及三署見徒董所降宥領宮職司詳賜
幣帛戊申車駕幸玄武湖講武甲子詔曰寔枯掩骼義
重前誥卹老哀癯寔惟令典朕求思民瘼弗忘鑒寐聲
恤未敷物多乖所京師二縣或有久墳毀族可隨宜掩

埋遺骸未櫬竝加斂瘞疾病窮困不能自存者詳為條格竝加沾賚冬十月丁巳以桂陽王鐸為南徐州刺史十一月丁亥以始興王鋌為益州刺史

三年春正月丙辰以大司農劉楷為交州刺史安西諮議叅軍崔慶緒為南梁秦二州刺史甲申以晉安王子懋為南豫州刺史辛卯車駕祀南郊大赦都邑三百里內罪應入重者降一等餘依赦制効繫之身降遣有差賑卹二縣貧民又詔曰春秋國語云生民之有學教猶

樹木之有枝葉果行育德咸必由茲在昔開運光宅華
夏方弘典謨克隆教思命彼有司崇建庠塾甫就經始
仍離屯故仰瞻徽猷歲月彌遠今遐邇一體車軌同文
宜高選學官廣延胄子又詔守宰親民之要刺史案部
所先宜嚴課農桑相土揆時必窮地利若耕蠶殊衆足
厲浮惰者所在即便列奏其違方驕矜佚事妨農亦以
名聞將明賞罰以勸勤怠校覈殿最歲竟攷課以申黜
陟二月辛丑車駕祀北郊夏四月戊戌以新除右衛將

軍豫章王世子子響為豫州刺史輔國將軍桓敬為兗
州刺史五月乙未詔曰氓俗凋弊於茲永久雖年穀時
登而歟乏比室凡單丁之身及癯獨而秩養養孤者竝
蠲今年田租是月省總明觀六月庚戌進河南王易度
侯為車騎將軍秋七月辛丑詔丹陽所領及餘二百里
內見囚同集京師自此以外委州郡決斷甲戌左光祿
大夫開府儀同三司王僧虔薨丁亥以驃騎中兵叅軍
董仲舒為寧州刺史八月乙未車駕幸中堂聽訟丁巳

以行宕昌王梁彌頡為河涼二州刺史戊午以尚書令
王儉領太子少傅太子詹事蕭順之為領軍將軍冬十
月壬戌詔曰皇太子長懋講畢當釋奠王公以下可悉
往觀禮十一月乙丑以冠軍將軍王文仲為青冀二州
刺史十二月丁酉詔曰九穀之重八材為末是故潔粢
豐盛祝史無愧於辭不籍千畝周宣所以貽諫昔期運
初啓庶政草昧三推之典我則未暇朕嗣奉鴻基思隆
先軌載耒躬親率由舊式可以開春茲歲敬簡元辰鳴

青鸞於東郊冤朱紘而莅事仰薦宗禋俯勗黔阜將使
困庾內充遺秉外拔既富而教茲焉攸在是夏琅邪郡
旱百姓芟除枯苗至秋擢穎大熟

四年春正月甲子以南琅邪彭城二郡太守隨郡王子
隆為江州刺史征虜長史張瓌為雍州刺史征虜將軍
薛淵為徐州刺史護軍將軍兼司徒竟陵王子良進號
車騎將軍富陽人唐寓之反聚衆桐廬破富陽錢塘等
縣害東陽太守蕭崇之遣宿衛兵出討伏誅丁酉冠軍

將軍馬軍主陳天福坐討唐寓之燒掠百姓棄市辛卯
車駕幸中堂策秀才閏月癸巳立皇子子貞為邵陵王
皇孫昭文為臨汝公丁未以武都王楊集始為北秦州
刺史辛亥車駕籍田詔曰夫耕籍所以表敬親載所以
率民朕景行前規躬執良耜千畝咸事六稔可期教義
克宣誠感無暢重以天符靈貺歲月鱗萃寶鼎開玉匣
之祥嘉禾發同穗之穎甘露凝暉於垆牧神爵騫翥於
蘭囿斯乃宗稷之慶豈寡薄所臻思俾休和覃茲黔阜

見刑罪殊死以下悉原宥諸逋負在三年以前尤窮弊者一皆蠲除孝悌力田詳授爵位孤老貧窮賜穀十石凡欲附農而糧種闕乏者竝加給貸務在優厚癸丑以始興內史劉勅為廣州刺史甲寅以籍田禮畢車駕幸閱武堂勞酒小會詔賜王公以下在位者帛有差戊午車駕幸宣武堂講武詔曰今親閱六師少長有禮領馭羣帥可量班賜二月己未立皇弟鉉為晉熙王鉉為河東王庚寅以光祿大夫王玄載為兗州刺史三月辛亥

國子講孝經車駕幸學賜國子祭酒博士助教綰各有
差夏四月丁亥以尚書左僕射柳世隆為湘州刺史臨
沂縣麥不登刈為馬芻至夏更苗秀五月癸巳詔楊南
徐二州今年戶租三分二取見布一分取錢來歲以後
遠近諸州輸錢處並減布直匹准四百依舊折半以為
永制丙午以吳興太守西昌侯鸞為中領軍秋八月辛
酉以鎮南長史蕭惠休為廣州刺史九月甲寅以征虜
將軍王廣之為徐州刺史冬十二月乙亥以東中郎司

馬崔慧景為司州刺史

五年春正月戊子以太尉豫章王嶷為大司馬車騎將軍竟陵王子良為司徒驃騎將軍臨川王映衛將軍王儉中軍將軍王敬則並本號開府儀同三司都官尚書沈文季為郢州刺史左將軍安陸王子敬為荊州刺史征虜將軍晉安王子懋為南兖州刺史輔國將軍建安王子真為南豫州刺史辛卯詔曰朕昧爽丕顯思康民瘼雖年穀亟登而饑饉代有今履端肇運陽和告始宜

協時休覃茲黎庶諸孤老貧病竝賜糧餼遣使親賦每
存均普雍司二州蠻虜屢動丁酉遣丹陽尹蕭景先出
平陽護軍將軍陳顯達出宛葉二月戊子車駕幸芳林
園禊宴丁未以護軍將軍陳顯達為雍州刺史夏四月
車駕殷祀太廟詔繫囚見徒四歲刑以下悉原遣五年
減為三歲京邑罪身應入重降一等六月辛酉詔曰比
霖雨過度水潦洊溢京師居民多離其弊遣中書舍人
二縣官長隨宜賑賜秋七月戊申詔丹陽屬縣建元四

年以來至永明三年所逋田租殊為不少京甸之內宜
加優貸其非中貲者可悉原停八月乙亥詔今夏雨水
吳興義興二郡田農多傷詳蠲租調九月己丑詔曰九
日出商飈館登高宴羣臣辛卯車駕幸商飈館上所
立在孫陵岡世呼為九日臺者也丙午詔曰善為國者
使民無傷而農益勸是以十一而稅周道克隆開建常
平漢載惟穆岱畎絲枲浮汶來貢杞梓皮革必緣楚往
自水德將謝喪亂彌多師旅歲興饑饉代有貧室盡於

課調泉貝傾於絕域軍國器用動資四表不因厥產咸
用九賦雖有文貿之名而無潤私之實民咨塗炭實此
之由昔在開運星紀末周餘弊尚重農桑不殷於曩日
粟帛輕賤於當年工商罕兼金之儲匹夫多饑寒之患
良由園法久廢上弊稍寡所謂民失其資能無匱乎凡
下貧之家可蠲三調二年京師及四方出錢億萬糴米
穀絲綿之屬其和價以優黔首遠邦嘗市雜物非土俗
所產者皆悉停之必是歲賦攸宜都邑所乏可見直和

市勿使逋刻冬十月甲申以中領軍武昌侯鸞為豫州
刺史侍中安陸侯緬為中領軍初起新林苑

六年春正月壬午以祠部尚書安成王勗為南徐州刺
史詔二百里內獄同集京師克日聽覽自此以外委州
郡評察三署徒隸詳所原釋三月己亥以豫章王世子
子響為巴東王癸卯以光祿大夫周盤龍為行兗州刺
史五月甲午以宕昌王梁彌承為河涼二州刺史六月
甲寅以散騎常侍沈景德為徐州刺史丙子以始興太

守房法乘為交州刺史秋七月乙巳都官尚書呂安國
為領軍將軍八月乙卯詔吳興義興水潦被水之鄉賜
廩疾篤瘞口二斛老疾一斛小口五斗九月壬寅車駕
幸琅邪城講武習水步軍冬十月庚申立冬初臨太極
殿讀時令辛酉以祠部尚書武陵王昇為江州刺史閏
月乙卯詔曰北兗北徐豫司青冀八州邊接疆場民多
懸磬原永明以前所逋租調辛卯以尚書僕射王奐為
領軍將軍十一月乙卯以羽林監費延宗為越州刺史

庚申以後將軍晉安王子懋為湘州刺史西陽王子明為南兗州刺史

七年春正月丙午以中軍將軍王敬則為豫州刺史中軍將軍陰智伯為梁南秦二州刺史戊申詔曰雍州頻歲戎役無水旱為弊原四年以前逋租辛亥車駕祀南郊大赦京邑貧民普加賑賜又詔曰春頒秋斂萬邦所以惟懷柔遠能邇北民所以允殖鄭渾宰邑因姓立名王濬剖符戶口殷盛今產子不育雖炳常禁比聞所在

猶或有之誠復禮以貧殺抑亦情由俗淡宜節以嚴威
敢以惠澤主者尋舊制詳量附定蠲卹之宜務存優厚
壬戌驃騎將軍開府儀同三司臨川王映薨戊辰詔曰
諸大夫年秩隆重祿力殊薄豈所謂下車惟舊趨橋敬
老可增俸詳給見役二月丙子以左衛將軍巴東王子
響為中護軍己丑詔曰宣尼誕敷文德峻極自天蒞輝
七代陶鈞萬品英風獨舉素王誰匹功隱於當年道深
於日月感麟厭世緬邈千祀川竭谷虛丘夷淵塞非但

洙泗湮淪至乃饗嘗之主前王敬仰崇修寢廟歲月亟
流鞠為茂草今學黉興立實稟洪規撫事懷人彌增欽
屬可改築宗祊務在爽塏量給祭秩禮同諸侯奉聖之
爵以時紹繼壬寅以丹陽尹王晏為江州刺史癸卯以
巴陵王子倫為豫州刺史三月丁未以太子右衛率王
玄邈為兗州刺史庚戌以中護軍巴東王子響為江州
刺史中書令隨郡王子隆為中護軍甲寅立皇子子岳
為臨賀王子峻為廣漢王子琳為宣城王子珉為義安

王夏四月戊寅詔曰婚禮下達人倫攸始周官設媒氏之職國風興及時之詠四爵內陳義不期侈三鼎外列事豈存奢晚俗浮麗歷茲永久每思懲革而民未知禁乃聞同牢之費華泰尤甚膳羞方丈有過王侯富者扇其驕風貧者恥躬不逮或以供帳未具動致推遷年不再來盛時忽往宜為節文頒之士庶竝可擬則公朝方標供設合卺之禮無虧寧儉之義斯在如故有違繩之以法五月乙巳尚書令衛將軍開府儀同三司王儉薨

甲子以新除尚書左僕射柳世隆為尚書令六月丁亥
車駕幸琅邪秋八月庚子以左衛將軍建安王子真為
中護軍冬十月己丑詔曰三季澆浮舊章陵替吉凶奢
靡動違矩則或裂錦繡以競車服之飾塗金鏤石以窮
瑩域之麗至班白不婚露棺累葉苟相誇衒罔顧大典
可明為條制嚴勒所在悉使畫一如復違犯依事糾奏
十二月己亥以中護軍建安王子真為郢州刺史江州
刺史巴東王子響為荊州刺史前安西司馬垣崇祖為

兗州刺史

八年春正月庚子征西大將軍王敬則進號驃騎大將軍左將軍沈文季為領軍將軍丹陽尹鄱陽王鏘為江州刺史詔放遣隔城虜俘聽還本土壬辰零陵王司馬藥師薨夏四月戊辰詔公卿已下各舉所知隨才授職進得其人受登賢之賞薦非其才獲濫舉之罰秋七月辛丑以會稽太守安陸侯緬為雍州刺史癸卯詔曰陰陽舛和緯象愆度儲胤嬰患淹歷旬晷思仰祇天戒俯

紓民瘼可大赦天下癸亥詔司雍二州比歲不稔雍州
八年以前司州七年以前逋租悉原汝南一郡復限更
申五年八月丙寅詔京邑霖雨既過居民汎濫遣中書
舍人二縣官長賑卹乙酉以行河南王世子休留代為
秦河二州刺史壬辰以左衛將軍隨郡王子隆為荊州
刺史巴東王子響有罪遣丹陽尹蕭順之率軍討之子
響伏誅冬十月丁丑詔吳興水淹過度開所在倉賑賜
癸巳原建元以前逋租十一月乙卯以建武將軍伏登

之為交州刺史十二月乙丑以振威將軍陳僧授為越州刺史戊寅詔尚書丞郎職事繁劇卹俸未復可量增賜祿已卯皇子子建為湘東王癸巳以監青冀二州軍行刺史事張沖為青冀二州刺史

九年春正月甲午以侍中江夏王鋒為南徐州刺史冠軍將軍劉悛為益州刺史辛丑車駕祀南郊詔京師見囚繫詳量原遣三月乙卯以南中郎司馬劉楨為司州刺史辛丑以太子左衛率劉纘為廣州刺史夏四月乙

亥有司奏舊格一年兩過行陵三月十五日曹郎以下
小行九月十五日司空以下大行今長停小行惟二州
一大行詔曰可六月甲戌以尚書左僕射王奐為雍州
刺史秋九月戊辰車駕幸琅邪城講武觀者傾都普頒
酒肉

十年春正月戊午詔諸責負衆逋七年前悉原除高
貲不在例孤老六疾人穀五斛内外有務衆官增祿俸
以左民尚書南平王銳為湘州刺史司徒竟陵王子良

領尚書令右衛將軍王玄邈為北徐州刺史中軍將軍
廬陵王子卿進號車騎將軍北中郎將南海王子罕為
兖州刺史輔國將軍臨汝公昭文為南豫州刺史冠軍
將軍王文和為北兖州刺史二月壬寅鎮軍將軍陳顯
達領中領軍夏四月辛丑大司馬豫章王嶷薨五月己
巳司徒竟陵王子良為揚州刺史秋八月丙申以新城
太守郭安明為寧州刺史冬十月乙丑車駕幸玄武湖
講武甲午車駕殷祀太廟十一月戊午詔曰頃者霖雨

樵糧稍貴京邑居民多離其弊遣中書舍人二縣官長賑賜

十一年春正月癸丑詔京師見繫囚詳所原遣以驃騎大將軍王敬則為司空江州刺史鄱陽王錡為領軍將軍鎮軍大將軍陳顯達為江州刺史右衛將軍崔慧景為豫州刺史丙子皇太子長懋薨二月壬午以車騎將軍廬陵王子卿為驃騎將軍南豫州刺史撫軍將軍安陸王子敬進號車騎將軍己丑輔國將軍曹虎為梁南

秦二州刺史癸卯以新除中書監晉安王子懋為雍州
刺史丙午以冠軍將軍王文和為益州刺史三月乙亥
雍州刺史王奐伏誅夏四月壬午詔東宮文武臣僚可
悉度為太孫官屬甲午立皇太孫昭業太孫妃何氏詔
賜天下為父後者爵一級孝子順孫義夫節婦粟帛各
有差癸卯以驍騎將軍劉靈哲為兗州刺史五月戊辰
詔曰水旱成災穀稼傷弊凡三調衆逋可同申至秋登
京師二縣朱方姑熟可權斷酒庚午以輔國將軍蕭惠

休為徐州刺史丙子以左民尚書宜都王鏗為南豫州
刺史六月壬午詔霖雨既過遣中書舍人二縣官長賑
賜京邑居民秋七月丁巳詔曰頃風水為災二岸居民
多離其患加以貧病六疾孤老稚弱彌足矜念遣中書
舍人履行沾卹又詔曰水旱為災實傷農稼江淮之間
倉廩既虛遂草竊充斥互相侵奪依阻山湖成此逋逃
曲赦南兗豫司徐五州南豫州之歷陽譙臨江廬江
四郡三調衆逋宿債竝同原除其緣淮及青冀新附僑

民復除已訖更申五年是月上不豫徙御延昌殿乘輿
始登階而殿屋鳴咤上惡之虜侵邊戊辰遣江州刺史
陳顯達鎮雍州樊城上慮朝野憂惶乃力疾召樂府奏
正聲伎戊寅大漸詔曰始終大期賢聖不免吾行年六
十亦復何恨但皇業艱難萬幾事重不能無遺慮耳太
孫進德曰茂社稷有寄子良善相毗輔思弘治道内外
衆事無大小悉與驚叅懷共下意尚書是職務根本
悉委王晏徐孝嗣軍旅捍邊之略委王敬則陳顯達王

廣之王玄邈沈文季張瓌薛淵等百辟庶僚各奉爾職
謹事太孫勿有懈怠知復何言又詔曰我識滅之後身
上著夏衣畫天衣純烏犀導應諸器服悉不得用寶物
及織成等惟裝複袂衣各一通常所服身刀長短二口
鐵環者隨我入梓宮祭敬之典本在因心東隣殺牛不
如西家禴祭我靈上慎勿以牲為祭惟設餅茶飲干飯
酒脯而已天下貴賤咸同此制未山陵前朔望設菜食
陵墓萬世所宅意常恨休安陵未稱今可用東三處地

最東邊以葬我名為景安陵喪禮每存省約不須煩民
百官停六時入臨朔望祖日可依舊諸主六宮竝不須
從山陵內殿鳳華壽昌耀靈三處是吾所改制夫貴有
天下富無四海宴處寢息不容乃陋謂此為奢儉之中
慎勿壞去顯陽殿玉像諸佛及供養具如別牒可盡心
禮拜供養之應有功德事可專在中自今公私皆不得
出家為道及起立塔寺以宅為精舍竝嚴斷之惟年六
十必有道心聽朝賢選序已有別詔諸小小賜乞及閣

內處分亦有別牒內外禁衛勞舊主帥左右悉付蕭譔
優量驅使之勿負吾遺意也是日上崩年五十四上剛
毅有斷為治總大體以富國為先頗不喜遊宴雕綺之
事言常恨之未能頓遣臨崩又詔凡諸遊費宜從休息
自今遠近薦獻務存節儉不得出界營求相高奢麗金
粟繒纊弊民已多珠玉玩好傷工尤重嚴加禁絕不得
有違准繩九月丙寅葬景安陵

史臣曰世祖南面嗣業功參寶命雖為繼體事實艱難

御衮垂旒深存政典文武授任不草舊章明罰厚恩皆由上出義無長遠莫不肅然外表無塵內朝多豫機事平理職貢有恒府藏內充民鮮勞役宮室苑囿未足以傷財安樂延年衆庶所同幸若夫割愛懷抱同彼甸人太祖羣昭位後諸穆昔漢武留情晚悟追恨戾園魏文侯克中山不以封弟英賢心迹臣所未詳也

贊曰武帝丕顯徽號止戈韶嶺歌祲彭派澄波威承景厯肅御金科北懷戎款南獻夷歌市朝晏逸中外寧和



南齊書卷三

南齊書卷三考證

武帝本紀生獲肅之斬首百餘級遂率部曲百餘人舉義兵○臣祖庚按宋書鄧琬傳云世子與南康相沈用之等據郡起義宋略亦云沈肅之以郡招起義據此則帝與肅之同起義矣與紀互異又按通鑑考異曰肅始自獄中刼出琬所署南康相不容便與之同則宋書誤也

三年八月丁巳以行宕昌王梁彌頡為河涼二州刺史

○臣祖庚按魏書三年七月魏遣使拜宕昌王梁彌
機兄子彌承為宕昌王與此互異

六年十月初臨太極殿讀時令○臣宗萬按漢儀太史
每歲上其年歷先立春立夏大暑立秋立冬常讀五
時令皇帝所服各隨五時之色帝升御座尚書令以
下就席位尚書三公郎以令署按上奏以入就席伏
讀訖賜酒一卮据此武帝是舉蓋遵古制前此未行
故曰初臨也

南齊書卷三考證

欽定四庫全書

南齊書卷四

梁

蕭

子

顯

撰

本紀第四

鬱林王

鬱林王昭業字元尚文惠太子長子也小名法身世祖
即位封南郡王二千戶永明五年十一月戊子冠於東
宮崇政殿其日小會賜王公以下帛各有差給昭業扶

二人七年有司奏給班劍二十人鼓吹一部高選友學
十一年給阜輪三望車詔高選國官文惠太子薨立昭
業為皇太孫居東宮世祖崩太孫即位八月壬午詔稱
先帝遺詔以護軍將軍武陵王曄為衛將軍征南大將
軍陳顯達即本號竝開府儀同三司尚書左僕射西昌
侯鸞為尚書令太孫詹事沈文季為護軍將軍癸未以
司徒竟陵王子良為太傅詔曰朕以寡薄嗣膺寶政對
越靈命欽若前圖思所以敬守成規拱揖羣后哀荒在

日有懜大猷宜育德振民光昭睿範凡逋三調及衆債
在今年七月三十日前悉同蠲除其備償封籍貸鬻未
售亦皆還主御府諸署池田邸冶興廢公事本施一時
於今無用者詳所罷省公宜權禁一以還民關市征賦
務從優減丙戌詔曰近北掠餘口悉充軍實刑故無小
罔或攸赦撫辜興仁事深睿範宜從蕩宥許以自新可
一同放遣還復民籍已賞賜者亦皆為贖辛丑詔曰往
歲蠻虜協謀志擾邊服羣帥授略大殲凶醜草城克捷

及舞陰固守二處勞人未有沾爵賞者可分遣選部往
彼序用九月癸丑詔東西二省府國長屯所積財單祿
寡良以矜懷選部可甄才品能推校年月邦守邑丞隨
宜量處以貧為先辛酉追尊文惠皇太子為世宗文皇
帝冬十月壬寅尊皇太孫太妃為皇太后立皇后何氏
十一月辛亥立臨汝公昭文為新安王曲江公昭秀為
臨海王皇弟昭粲為永嘉王

隆昌元年春正月丁未改元大赦加太傅竟陵王子良

殊禮驍騎將軍晉熙王鈔為郢州刺史丹陽尹安陸王
子敬為南兖州刺史征北大將軍晉安王子懋為江州
刺史臨海王昭秀為荊州刺史永嘉王昭粲為南徐州
刺史征南大將軍陳顯達進號車騎大將軍郢州刺史
建安王子真為護軍將軍詔百僚極陳得失又詔王公
以下各舉所知戊申以護軍將軍沈文季為領軍將軍
己酉以前將軍曹虎為雍州刺史右衛將軍薛淵為司
州刺史庚戌以寧朔將軍蕭懿為梁南秦二州刺史輔

國長史申希祖為交州刺史辛亥車駕祀南郊詔曰執
耜暫忘懸磬比室秉機或惰無褐終年非怠非荒雖由
王道不稂不莠實賴民和頃歲多稼無爽遺秉如積而
三登之善未臻萬斯之基尚遠且風土異宜百民舛務
刑章治緒未必同源妨本害政事非一揆冤旒屬念無
忘夙興可嚴下州郡務滋耕殖相畝闢疇廣開地利深
樹國本克阜民天又詢訪獄市博聽謠俗傷風損化各
以條聞主者詳為條格戊午車駕拜景安陵己巳以新

除黃門侍郎周奉叔為青州刺史二月辛卯車駕祀明
堂夏四月辛巳衛將軍開府儀同三司武陵王曄薨戊
子太傅竟陵王子良薨戊戌以前沙州刺史楊晃為沙
州刺史丁酉以驃騎將軍廬陵王子卿為衛將軍尚書
右僕射鄱陽王鏘為驃騎將軍竝開府儀同三司閏月
乙丑以南東海太守蕭頴胄為青冀二州刺史丁卯鎮
軍大將軍鸞即本號開府儀同三司戊辰以中軍將軍
新安王昭文為揚州刺史六月丙寅以黃門侍郎王思

遠為廣州刺史秋七月庚戌以中書郎蕭遙欣為兗州
刺史東莞太守臧靈智為交州刺史癸巳皇太后令曰
鎮軍車騎左僕射前將軍領軍左衛衛尉八座自我皇
厯啓基受終於宋睿聖繼軌三葉重光太祖以神武創
業草昧區夏武皇以英明提極經緯天人文帝以上哲
之資體元良之重雖功未被物而德已在民三靈之眷
方永七百之基已固嗣主特鍾沴氣爰表弱齡戾著
於綠車愚固彰於崇正狗馬是好酒色方湏所務惟鄙

事所疾惟善人世祖慈愛曲深每加容掩冀年志稍改
立守神器自入纂鴻業長惡滋甚居喪無一日之哀縗
經為歡宴之服昏酣長夜萬幾斯雍發號施令莫知所
從闇豎徐龍駒專總樞密奉叔珍之互執權柄自以為
任得其人表裏緝穆邁蕭曹而愈信布倚太山而坐平
原於是恣情肆意罔顧天顯二帝姬嬪竝充寵御二宮
遺服皆納玩府內外混漫男女無別丹屏之北為酤鬻
之所青蒲之上開桑中之肆又微服潛行信次忘反端

委以朝虛位交戟而守空宮積旬矣宰輔忠賢盡誠奉
主誅鋤羣小異能懷草苗無克已更深怨憾公卿股肱
以異已寘戮文武昭穆以德譽見猜放肆醜言將行屠
膾社稷危殆有過綴旒昔太宗克光於漢世簡文代興
於晉氏前事之不忘後人之師也鎮軍居正體道家國
是賴伊霍之舉實寄淵謨便可詳依舊典以禮廢黜中
軍將軍新安王體自文皇睿哲天秀宜入嗣鴻業永寧
四海外即以禮奉迎未亡人屬此多難投筆增慨昭業

少美容止好隸書世祖勅皇孫手書不得妄出以貴重
之進對音吐甚有令譽王侯五日一問訊世祖常獨呼
昭業至幄座別加撫問呼為法身鍾愛甚重文惠皇太
子薨昭業每臨哭輒號咷不自勝俄爾還內歡笑極樂
在世祖喪哭泣竟入後宮嘗列胡妓二部夾閣迎奏為
南郡王時文惠太子禁其起居節其用度昭業謂豫章
王妃庾氏曰阿婆佛法言有福德生帝王家今日見作
天王便是大罪左右主帥動見拘執不如作市邊屠酤

富兒百倍矣及即位極意賞賜動百數十萬每見錢輒曰我昔時思汝一文不得今得用汝未期年之間世祖齋庫儲錢數億垂盡開主衣庫與皇后寵姬觀之給閹人豎子各數人隨其所欲恣意輦取取諸寶器以相剖擊破碎之以為笑樂居嘗裸袒著紅縠禪雜采袒服好鬪雞密買雞至數千價世祖御物甘草杖宮人寸斷用之毀世祖招婉殿乞閹人徐龍駒為齋龍駒尤親幸為後閣舍人日夜在六宮房內昭業與文帝幸姬霍氏淫

通龍駒勸長留宮內聲云度霍氏為尼以餘人代之嘗以邪諂自進每謂人曰古時亦有監作三公者皇后亦淫亂齋閣通夜洞開內外淆雜無復分別中書舍人綦母珍之朱隆之直閣將軍曹道剛周奉叔竝為帝羽翼高宗屢諫不納先啓誅龍駒次誅奉叔及珍之帝竝不能違既而尼媼外入頗傳異語乃疑高宗有異志中書令何胤以皇后從叔見親使直殿省嘗随后呼胤為三父與胤謀誅高宗令胤受事胤不敢當依違杜諫帝意

復止乃謀出高宗於西州中勅用事不復關諮高宗慮
變定謀廢帝二十二日壬辰使蕭諶坦之等於省誅曾
道剛朱隆之等率兵自尚書入雲龍門戎服加朱衣於
上比入門三失履王晏徐孝嗣蕭坦之陳顯達王廣之
沈文季係進帝在壽昌殿聞外有變使閉內殿諸房閣
令閹人登興光樓望還報云見一人戎服從數百人急
裝在西鍾樓下須臾蕭諶領兵先入宮截壽昌閣帝走
向愛姬徐氏房拔劍自刺不中以帛纏頸輿接出延德

殿謚初入殿宿衛將士皆搃弓楯欲拒戰謚謂之曰所
取自有人卿等不須動宿衛信之及見帝出各欲自奮
帝竟無一言出西弄殺之時年二十一輿尸出徐龍駒
宅殯葬以王禮餘黨亦見誅

史臣曰鬱林王風華外美衆所同惑伏情隱詐難以貌
求立嫡以長未知瑕豐世祖之心不變周道既而讐鄙
內作兆自宮闈雖為害未遠足傾社稷春秋書梁伯之
過言其自取亡也

贊曰十僂有一無國不失鬱林負荷棄禮亡律

南齊書卷四

南齊書卷四考證

鬱林王本紀出西弄○臣祖庚按通鑑注云此延德殿

之西弄也集韻曰弄厦也屏也亦作屏

南齊書卷四考證

欽定四庫全書

南齊書卷五

梁 蕭 子 顯 撰

本紀第五

海陵王

海陵恭王昭文字季尚文惠太子第二子也永明四年
封臨汝公邑千五百戶初為輔國將軍濟陽太守十年
轉持節督南豫州諸軍事南豫州刺史將軍如故十一

年進號冠軍將軍文惠太子薨還都鬱林王即位為中
軍將軍領兵置佐封新安王邑二千戶隆昌元年為使
持節都督揚南徐二州諸軍事揚州刺史將軍如故其
年鬱林王廢尚書令西昌侯鸞議立昭文為帝延興元
年秋七月丁酉即皇帝位以尚書令鎮軍大將軍西昌
侯鸞為驃騎大將軍錄尚書事揚州刺史宣城郡公詔
曰太祖高皇帝英謀光大受命作齊世祖武皇帝宏猷
冠世繼暉下武世宗文皇帝清明懿鑠四海宅心竝德

漏下泉功昭上象聲教所覃無思不洽洪基式固景祚
方融而天步多阻運鍾否剝嗣君昏忍暴戾滋多棄侮
天經悖滅人紀朝野重足遐邇側視民怨神恫宗祧如
綴賴忠謨肅舉霄漢廓清俾三后之業絕而更紐七百
之慶危而復安猥以冲人入纂乾緒載懷馭朽若墜諸
淵思與黎元共綏戩福大赦改元文武賜位二等八月
甲辰以新除衛尉蕭諶為中領軍司空王敬則進位太
尉新除車騎大將軍陳顯達為司空尚書左僕射王晏

為尚書令左衛將軍王廣之為豫州刺史驃騎大將軍
鄱陽王鏘為司徒詔遣大使巡行風俗丁未詔曰新安
國五品以上悉與滿叙自此以下皆聽解遣其欲仕者
適其所樂以驍騎將軍河東王鉉為南徐州刺史西中
郎將臨海王昭秀為車騎將軍南徐州刺史永嘉王昭
粲為荊州刺史戊申以輔國將軍王詡為廣州刺史中
書郎蕭遙欣為兗州刺史庚戌以車騎板行參軍李慶
綜為寧州刺史辛亥以安西將軍王玄邈為中護軍新

除後軍司馬蕭誕為徐州刺史壬子以冠軍司馬臧靈
智為交州刺史乙卯申明織成金薄緣花錦綉履之禁
九月癸酉詔曰頃者以淮關徭戍勤瘁於行役故覃以
榮階薄酬厥勞動狀淹留未集王府非所以急舍爵之
典趣報功之旨便可分遣使部往彼銓用辛巳以前九
真太守宋慈明為交州刺史癸未誅新除司徒鄱陽王
鏘中軍大將軍隨郡王子隆遣平西將軍王廣之誅南
兖州刺史安陸王子敬於是江州刺史晉安王子懋起

兵遣中護軍王玄邈討之乙未驃騎大將軍鸞假黃鉞
內外纂嚴又誅湘州刺史南平王銳郢州刺史晉熙王
鈔南豫州刺史宜都王鏗丁亥以衛將軍廬陵王子卿
為司徒撫軍將軍桂陽王鐸為中軍將軍開府儀同三
司冬十月癸巳詔曰周設媒官趣及時之制漢務輕徭
在休息之典所以布德弘教寬俗阜民朕君制八紘志
敷九德而習俗之風為弊未改靜言多愠無忘昏昃督
勸婚嫁宜嚴申明必使禽幣以時標梅息怨正厨諸

役舊出州郡徵吏民以應其數公獲二旬私累數朔又
廣陵年常逋出千人以助淮戍勞擾為煩抑亦芑苴是
育今竝可長停別量所出諸縣使村長路都防城直縣
為劇尤深亦宜禁斷丁酉解嚴進驃騎大將軍揚州刺
史宣城公鸞為太傅領大將軍揚州牧加殊禮進爵為
王戊戌誅新除中軍將軍桂陽王鑠撫軍將軍衡陽王
鈞侍中祕書監江夏王鋒鎮軍將軍建安王子真左將
軍巴陵王子倫癸卯以寧朔將軍蕭遙欣為豫州刺史

新除黃門郎蕭遙昌為郢州刺史輔國將軍蕭誕為司
州刺史宣城王輔政帝起居皆諮而後行思食蒸魚菜
太官令答無錄公命竟不與辛亥皇太后令曰司空後
將軍丹陽尹右僕射中領軍八座夫明晦迭來屯平代
有上靈所以瞻命億兆所以歸懷自皇家淳耀列聖繼
軌諸侯官方百神受職而殷憂時啓多難薦臻隆昌失
德特紊人鬼非徒四海解體乃亦九鼎將移賴天縱英
輔大臣社稷崩基重造隆典再興嗣主幼沖庶政多昧

且早嬰疔疾弗克負荷所以宗正內侮戚藩外叛覘天
視地人各有心雖三祖之德在民而七廟之危行及自
非樹以長君鎮以淵器未允天人之望寧息奸宄之謀
太傅宣城王肩體宣皇鍾慈太祖識冠生民功高造物
符表夙著謳頌有在宜入承寶命式寧宗祏帝可降封
海陵王吾當歸老別館昔宣帝中興漢室簡文重延晉
祀庶我鴻基於茲永固言念家國感慶載懷建武元年
詔海陵王依漢東海王彊故事給虎賁旄頭畫輪車設

鍾虞宮縣供奉所須每存隆厚十一月稱王有疾數遣御師占視乃殞之給溫明祕器衣一襲斂以衮冕之服大鴻臚監護喪事葬給輜輶車九旒大輅黃屋左纛前後部羽葆鼓吹挽歌二部依東海王故事謚曰恭王年十五

史臣曰郭璞稱永昌之名有二日之象而隆昌之號亦同焉案漢中平六年獻帝即位便改元為光熹張讓段珪誅後改元為昭寧董卓輔政改元為永漢一歲四號

也晉惠帝太安二年長沙王乂事敗成都王穎改元為永安穎自鄴奪河間王顥復改元為永興一歲三號也隆昌延興建武亦三改年號故知喪亂之軌迹雖千載而必同矣

贊曰穆穆海陵因亡代興不先不後遭命是膺

南齊書卷五

南齊書卷五考證

海陵王本紀延興元年○是年即隆昌元年以廢立随改元耳

八月丁未詔曰新安國五品以上悉與滿叙○南史不載海陵以新安入纂故云

南齊書卷五考證

欽定四庫全書

南齊書卷六

梁

蕭

子

顯

撰

本紀第六

明帝

高宗明皇帝諱鸞字景栖始安貞王道生子也小諱玄
度少孤太祖撫育恩過諸子宋泰豫元年為安吉令有
嚴能之名補武陵王左常侍不拜元徽二年為永世令

昇明二年為邵陵王安南記室參軍未拜仍遷寧朔將軍淮南宣城二郡太守尋進號輔國將軍太祖踐阼遷侍中封西昌侯邑千戶建元二年為持節督郢州司州之義陽諸軍事冠軍將軍郢州刺史進號征虜將軍世祖即位轉度支尚書領右軍將軍永明元年遷侍中領驍騎將軍王子侯舊乘纏帷車高宗獨乘下帷儀從如素士公事混撓販食人擔火誤燒牛鼻豫章王白世祖世祖笑焉轉為散騎常侍左衛將軍清道而行上甚悅

二年出為征虜將軍吳興太守四年遷中領軍常侍並
如故五年為持節監豫州郢州之西陽司州之汝南二
郡軍事右將軍豫州刺史七年為尚書右僕射八年加
領衛尉十年轉左僕射十二年領右衛將軍世祖遺詔
為侍中尚書令尋加鎮軍將軍給班劍二十人隆昌元
年即本號為大將軍給鼓吹一部親兵五百人尋又加
中書監開府儀同三司鬱林王廢海陵王立為使持節
都督揚南徐二州軍事驃騎大將軍錄尚書事揚州刺

史開府如故增班劍為三十人封宣城郡公二千戶鎮東府城給兵五千人錢二百萬布千匹九江作難假黃錢事寧表送之尋加黃錢都督中外諸軍事太傅領大將軍揚州牧增班劍為四十人給幢絡三望車前後部羽葆鼓吹劍履上殿入朝不趨贊拜不名置左右長史司馬從事中郎掾屬各四人封宣城王邑五千戶持節侍中中書監錄尚書竝如故未拜太后令廢海陵王以上八纂太祖為第三子羣臣三請乃受命

建武元年冬十月癸亥即皇帝位詔曰皇齊受終建極
握鏡臨宸神武重輝欽明懿鑠七百攸長盤石斯固而
王度中蹇天階荐阻嗣命多違蕃豐孔棘宏圖景厯將
隆諸淵宣德皇后遠鑒崇替憲章舊典疇咨台揆允定
靈策用集寶命於予一人猥以虛薄纘承大業仰繫鴻
丕顧臨兆民永懷先構若履春冰寅憂夕惕固識攸濟
思與萬國播此惟新大赦天下改元宿衛身普轉一階
其餘文武賜位二等逋祖宿責換負官物在建武元年

以前悉原除劫賊餘口在臺府者可悉原放負豐流徙
竝還本鄉太尉王敬則為大司馬司空陳顯達為太尉
尚書令王晏加驃騎大將軍中領軍蕭詵為領軍將軍
南徐州刺史皇子寶義為揚州刺史中護軍王玄邈為
南兖州刺史新除右將軍張瓌為右光祿大夫平北將
軍王廣之為江州刺史乙丑詔斷遠近上禮丁卯詔自
今彫文篆刻歲時光新可悉停省蕃牧守宰或有薦獻
事非任土嚴加禁斷追贈安陸昭侯緬為安陸王已巳

以安陸侯子寶暉為湘州刺史詔曰頃守職之吏多違
舊典存私害公實興民蠹今商旅稅石頭後渚及夫鹵
借倩一皆停息所在凡厥公宜可即符斷主曹詳為其
制憲司明加聽察十一月癸酉以西中郎長史始安王
遙光為揚州刺史晉壽太守王洪範為青冀二州刺史
尚書令王晏領太子少傅甲戌大司馬尋陽公王敬則
等十三人進爵邑各有差詔省新林苑先是民地悉以
還主原責本直庚辰立皇子寶義為晉安王寶玄為江

夏王寶源為廬陵王寶寅為建安王寶融為隨郡王寶攸為南平王甲申詔曰邑宰祿薄俸微不足代耕雖任土恒貢亦為勞費自今悉斷又詔宣城國五品以上悉與滿叙自此以下皆聽解遣其欲仕適所樂乙酉追尊始安貞王為景皇妃為懿后丙戌以輔國將軍聞喜公遙欣為荊州刺史寧朔將軍豐城公遙昌為豫州刺史丁亥詔細作中署材官車府凡諸工可悉開番假遞令休息戊子立皇太子寶卷賜天下為父後者爵一級孝

子順孫義夫節婦普加甄賜明揚表其衡閭賚以東帛
已丑詔東宮肇建遠近或有慶禮可悉斷之壬辰以新
除征虜將軍江夏王寶玄為郢州刺史永明中御史中
丞沈淵表百官年登七十皆令致仕竝窮困私門庾子
詔曰日者百司耆齒許以自陳東西二省猶沾微俸辭
事私庭榮祿無謝興言愛老實有矜懷自縉紳年及可
一遵永明七年以前銓叙之科上輔政所誅諸王是月
復屬籍各封子為侯十二月壬子詔曰上覽易遺下情

難達是以甘棠見美肺石流詠自月一視黃辭如有含
枉不申懷直未舉者莅民之司竝任厥失

二年春正月辛未詔京師繫囚殊死可降為五歲刑三
署見徒五歲以下悉原赦王公以下各舉所知隨王公
卿士內外羣僚各舉朕違肆心極諫索虜寇司豫徐梁
四州士申遣鎮南將軍王廣之督司州征討右衛將軍
蕭坦之督徐州征討尚書右僕射沈文季督豫州征討
已卯詔京師二縣有毀葬墳壠隨宜修理又詔曰食惟

民天義高姬載螭寶生本教重軒經前哲盛範後王茂
則布令審端咸必由之朕肅宸巖廊思引風訓深務八
政永鑒在勤靜言日昃無忘寢興守宰親民之主牧伯
調俗之司宜嚴課農桑閭令游惰揆景肆力必窮地利
固修堤防考校殿最若耕蠶殊衆具以名聞游怠害業
即便列奏主者詳為條格乙未虜攻鍾離徐州刺史蕭
惠休破之丙申加太尉陳顯達使持節都督西北征討
諸軍事丁酉内外纂嚴三月戊申詔南徐州僑舊民丁

多充戎旅蠲今年三課已未司州刺史蕭誕與衆軍擊虜破之詔雍豫司南充徐五州遇寇之家悉停今年稅調其與虜交通不問往罪丙寅停青州麥租虜自壽春退走甲申解嚴夏四月己亥朔三百里內獄訟同集京師克日聽覽此外委州郡訊察三署徒隸原遣有差索虜圍漢中梁州刺史蕭懿拒退之己未以新除黃門郎裴叔業為徐州刺史五月甲午寢廟成詔監作長帥可賜位一等復身遣假一年非役者蠲租同假限六月

壬戌誅領軍將軍蕭諶西陽王子明南海王子罕邵陵
王子貞乙丑以右衛將軍蕭坦之為領軍將軍秋七月
辛未以右將軍晉安王寶義為南徐州刺史壬申以冠
軍將軍梁王為司州刺史辛卯以氏楊馥之為北秦州
刺史仇池公八月丁未以右衛將軍廬陵王寶源為南
兖州刺史庚戌以新除輔國將軍申希祖為兖州刺史
九月己丑改封南平王寶攸為邵陵王蜀郡王子文為
西陽王廣漢王子峻為衡陽王臨海王昭秀為巴陵王

永嘉王昭祭為桂陽王冬十月丁卯詔曰軌世去奢事
殷哲后訓物以儉理鏡前王朕屬流弊之末靜澆淳之
季雖恭已弘化刻意隆平而禮讓未興侈華猶競永覽
玄風兢言集愧思所以還淳改俗反古移民可罷東田
毀興光樓并詔水衡量省御乘乙卯納皇太子妃褚氏
大赦王公已下班賜各有差斷四方上禮十二月丁酉
詔曰舊國都邑望之悵然況乃自經南面負宸宸居或
功濟當時德覃一世而塋壠攢穢封樹不修豈直嗟深

牧豎悲甚信陵而已哉昔中京淪覆鼎玉東遷晉元締
構之始簡文遺詠在民而松門夷替堦路榛蕪雖年代
殊往撫事興懷晉帝諸陵悉加修理并增守衛吳晉陵
二郡失稔之鄉蠲三調有差

三年春正月丁酉以陰平王楊昺子崇祖為沙州刺史
封陰平王北中郎將建安王寶寅為江州刺史己巳詔
申明守長六周之制乙酉詔去歲索虜寇邊緣邊諸州
郡將士有臨陣及疾病死亡者並送還本土三月壬午

詔車府乘輿有金銀飾校者皆剔除夏四月虜寇司州
戍兵擊破之五月己巳以征虜將軍蕭懿為益州刺史
前軍將軍陰廣宗為梁南秦二州刺史前新除寧州刺
史李慶宗為寧州刺史秋九月辛酉以冠軍將軍徐玄
慶為兗州刺史冬十月以輔國將軍申希祖為司州刺
史閏十二月戊寅皇太子冠賜王公以下帛各有差為
父後者賜爵一級斷遠近上禮又詔今歲不須光新可
以見錢為百官供給

四年春正月庚午大赦詔曰嘉肴停俎定方旨於必甘
良玉在攻表珪璋於既就是以陶鈞萬品務本為先經
緯九區學數為大往因時康崇建庠序屯虞荐有權從
省廢謳誦窳寥倏移年稔永言古昔無忘旰食今華夏
乂安要荒慕嚮締修東序實允適時便可式依舊章廣
延國胄弘敷景業光被後昆壬寅詔民產子者蠲其父
母調役一年又賜米十斛新婚者蠲夫役一年丙辰尚
書令王晏伏誅二月甲子以左僕射徐孝嗣為尚書令

征虜將軍蕭季敞為廣州刺史三月乙未右僕射沈文
季領護軍將軍秋八月追尊景皇所生王氏為恭太后
索虜寇河北冬十月又寇司州甲戌遣太子中庶子梁
王右軍司馬張稷討之十一月丙辰以氏楊靈珍為北
秦州刺史仇池公武都王丁亥詔所在結課屋宅田桑
可詳減舊價十二月甲子以冠軍將軍裴叔業為豫州
刺史冠軍將軍徐玄慶為徐州刺史寧朔將軍左興盛
為兗州刺史丁丑遣度支尚書崔慧景率眾救雍州

永泰元年春正月癸未朔大赦逋租宿債在四年之前
皆悉原除中軍大將軍徐孝嗣即本號開府儀同三司
河北諸郡為虜所侵相繼敗沒乙巳遣太尉陳顯達持
節救雍州丁未誅河東王鉉臨賀王子岳西陽王子文
衡陽王子峻南康王子琳永陽王子珉湘東王子建南
郡王子夏桂陽王昭粲巴陵王昭秀二月癸丑遣左衛
將軍蕭惠休假節援壽陽辛未豫州刺史裴叔業擊虜
於淮北破之辛巳平西將軍蕭遙欣領雍州刺史三月

丙午蠲雍州遇虜之縣租布戊申詔曰仲尼明聖在躬
允光上哲弘厥雅道大訓生民師範百王軌儀千載立
人斯仰忠孝攸出玄功潛被至德彌闡雖反袂遐曠而
祧薦靡闕時祭舊品秩比諸侯頃歲以來祀典陵替俎
豆寂寥牲奠莫舉豈所以克昭盛烈永隆風教者哉可
式循舊典詳復祭秩使牢餼備禮欽饗無申夏四月甲
寅改元赦三署囚繫原除各有差文武賜位二等丙戌
以鎮軍將軍蕭坦之為侍中中領軍己未立武陵昭王

子子坦為衡陽王丙寅以西中郎長史劉暄為郢州刺
史丁卯大司馬會稽太守王敬則舉兵反五月壬午遣
輔國將軍劉山陽率軍東討乙酉斬敬則傳首曲赦浙
東吳晉陵七郡以後軍長史蕭穎胄為南充州刺史丁
酉以北中郎將司馬元和為兗州刺史秋七月以輔國
將軍王珍國為青冀二州刺史癸卯以太子中庶子梁
王為雍州刺史太尉陳顯達為江州刺史己酉帝崩正
福殿年四十七遺詔曰徐令可重申八命中書監本官


悉如故沈文季可左僕射常侍護軍如故江柘可右僕射江祀可侍中劉暄可衛尉軍政大事委陳太尉內外衆事無大小委徐孝嗣遙光坦之江柘其大事與沈文季江祀劉暄參懷心膂之任可委劉悛蕭惠休崔慧景葬興安陵帝明審有吏才持法無所借制御親幸臣下肅清驅使寒人不得用四幅織太存儉約罷世祖所起新林苑以地還百姓廢文帝所起太子東田斥賣之永明中興輦舟乘悉剔取金銀還主衣庫太官進御食有

裏蒸帝曰我食此不盡可四片破之餘充晚食而世祖
掖庭中宮殿服御一無所改性猜忌多慮故亟行誅戮
潛信道術用計數出行幸先占利害南出則唱云西行
東遊則唱云北幸簡於出入竟不南郊上初有疾無輟
聽覽祕而不傳及寢疾甚久勅臺省府署文簿求白魚
以為治外始知之身衣絳衣服飾皆赤以為厭勝巫覡
云後湖水頭經過宮內致帝有疾帝乃自至太官行水
溝左右啓太官若無此水則不立帝決意塞之欲南引

淮流會崩事寢

史臣曰高宗以支庶纂厯據猶子而為論一朝到此誠非素心遺寄所當諒不獲免夫戕夷之事懷抱多端或出自雄忍或生乎畏懾令同財之親在我而先棄進引之愛量物其必遠疑怯既深猜似外入流涕行誅非云義舉事苟求安能無內愧既而自樹本根枝屑孤弱貽厥不昌終覆宗社若令鑿鈕之徵必委天命盤庚之祀亦繼陽甲杖運推公夫何譏爾

贊曰高宗傍起宗國之慶慕名儉德垂文法令兢兢小心察察吏政沔陽失土南風不競



南齊書卷六

南齊書卷六考證

明帝本紀三年春正月丁酉○通鑑考異曰案長厯是月乙丑朔無丁酉下有己巳當作丁卯

四年春正月庚午○通鑑考異曰案長厯是月己丑朔無庚午通鑑所以不曰

永泰元年七月以太尉陳顯達為江州刺史○臣祖庚按陳顯達傳顯達敗於馬圈表解職不許求降號又不許乃除江州又云東昏立顯達彌不樂還京師得

此授甚喜據此則刺史江州在東昏立後馬圈之敗
亦在永元元年情事適合况明帝末顯達方以三公
擊魏不容無故除江州也

南齊書卷六考證